

摛藻堂四庫全書薈要

史部

欽定四庫全書會要

史部

宋史卷一百八十四



詳校官編修臣王天祿

欽定四庫全書
會要卷五千八百十二

史部

宋史卷一百八十四

元中書右丞相總裁托克托等修

食貨志第一百三十七

食貨下六 茶下

茶天聖三年八月詔翰林侍講學士孫奭等同究利害
奭等言十三場茶積而未售者六百一十三萬餘斤蓋
許商人貼射則善者皆入商人其入官者皆麤惡不時

故人莫肯售又園戶輸歲課不足者使如商人入息而
園戶皆細民貧弱力不能給煩擾益甚又姦人倚貼射
為名強市盜販侵奪官利其弊不可不革十月遂罷貼
射法官復給本錢市茶商人入錢以售茶者奭等又欲
優之請凡入錢京師售海州荆南茶者損為七萬七千
售真州等四務十三場茶者又第損之給茶皆直十萬
自是河北入中復用三說法舊給東南緝錢者以京師
榷貨務錢償之奭等議既用益以李諮等變法為非明

年據計置司所上天聖二年比視增虧數差謬詔令嘗
典議官張士遜等條析更簡言天聖初環慶等路數奏
芻糧不給京師府藏常闕緝錢吏兵月奉僅能取足自
變法以來京師積錢多邊計不聞告之中間蕃部作亂
調發兵馬仰給有司無不足之患以此推之頗有成效
三司比視數目差互不同非執政所能親自較計然士
遜等猶被罰謫罷三司使初園戶負歲課者如商人入
息後不能償至四年太湖等九場凡逋息錢十三萬緝

詔悉蠲之然自奭等改制而茶法寢壞景祐中三司使孫居中等言自天聖三年變法而河北入中虛估之弊復類乾興以前蠹耗縣官請復行見錢法時諮已執政矣三年河北轉運使楊偕亦陳三說法十二害見錢法十二利以謂止用三說所支一分緡錢足以贍一歲邊計遂命諮與參知政事蔡齊等合議且令詔商人訪其利害是歲三月諮等請罷河北入中虛估以實錢償芻粟實錢售茶皆如天聖元年之制又以北商持券至京

師舊必得交引鋪為之保任并得三司符驗然後給錢
以是京師坐賈率多邀求三司吏稽留為姦乃悉罷之
命商持券徑趣榷貨務驗實立償之錢初奭等雖增商
人入錢之數而猶以為利薄故競市虛估之券以射厚
利而入錢者寡縣官日以侵削京師少蓄藏至是詔等
請視天聖三年入錢數第損一千有奇入中增直亦視
天聖元年數第加三百詔皆可之前已用虛估給券者
給茶如舊仍給景祐二年已前茶既而諸等又言天聖

四年嘗許陝西入中願得茶者每錢十萬所在給券徑
趣東南受茶一十萬一千茶商獲利爭欲售陝西券故
不復入錢京師請禁止之并言商人所不便者其事甚
悉請為更約束重私販之禁聽商人輸錢五分餘為置
籍召保期半年悉償失期者倍其數事皆施行諸等復
言自奭等變法歲損財利不可勝計且以天聖九年至
景祐二年較之五年之間河北入中虛費緡錢五百六
十八萬今一旦復用舊法恐豪商不便依託權貴以動

朝廷請先期申諭於是帝為下詔戒敕而縣官濫費自此少矣久之上書者復言自變法以來歲輦京師金帛易芻粟於河北配擾居民內虛府庫外困商旅非便寶元元年命御史中丞張觀等與三司議之觀等復請入錢京師以售真州等四務十三塲茶直十萬者又視景祐三年數損之為錢六萬七千入中河北願售茶者又捐一千既而詔又第捐二千於是入錢京師止為錢六萬五千入中河北為錢六萬四千而已康定元年葉清

臣為三司使是歲河北穀賤因請內地諸州行三說法募人入中且以東南鹽代京師實錢詔糴止二百萬石慶歷二年又請募人入芻粟如康定元年法數足而止自是三說稍復用矣八年三司鹽鐵判官董沔亦請復三說法三司以為然因言自見錢法行京師錢入少出多慶歷七年榷貨務緝錢入百十九萬出二百七十六萬以此較之恐無以贍給請如沔議以茶鹽香藥緝錢四物如之於是又有四說之法初詔止行於並邊諸州而

內地諸州有司蓋未嘗請即以康定元年詔書從事自是三說四說二法並行於河北不數年間茶法復壞芻粟之直大約虛估居十之八米斗七百甚者千錢券至京師為南商所抑茶每直十萬止售錢三千富人乘時收蓄轉取厚利三司患之請行貼買之法每券直十萬比市估三千倍為六千復入錢四萬四千貼為五萬給茶直十萬詔又損錢一萬然亦不足以平其直久之券比售錢三千者纔得二千往往不售北商無利入中者

寡公私大敝皇祐二年知定州韓琦及河北轉運司皆以為言下三司議三司奏自改法至今凡得穀二百二十八萬餘石芻五十六萬餘圍而費緡錢一百九十五萬有奇茶鹽香藥又為緡錢一千二百九十五萬有奇茶鹽香藥民用有限榷貨務歲課不過五百萬緡今散於民間者既多所在積而不售故券直亦從而賤茶直十萬舊錢六萬五千今止二千以至香一斤舊售錢三千八百今止五六百公私兩失其利請復行見錢法一

用景祐三年約束乃下詔曰比食貨法壞芻粟價益倍
縣官之費日長商賈不行豪富之家乘時牟利吏緣為
姦自今有議者須究厥理審可施用若事已上而驗問
無狀者寘之重罰是時雖改見錢法而京師積錢少恐
不足以支入中之費帝又出內藏庫錢帛百萬以賜三
司久之入中者寗多京師帑藏益乏商人持券以俟動
彌歲月至損其直以售於蓄賈之家言利者請出內藏
庫錢稍增價售之歲可得遺利五十萬緡既行而諫官

范鎮謂內藏庫權貨務皆領縣官豈有權貨務故稽商人而令內藏乘時射利傷體壞法莫甚為甚詔即罷之然自此並邊虛估之弊復起至和三年河北提舉糴便糧草薛向建議並邊十七州軍歲計粟百八十萬石為錢百六十萬緡豆六十五萬石芻三百七十萬圍並邊租賦歲可得粟豆芻五十萬其餘皆商人入中請罷並邊入粟自京輦錢帛至河北專以見錢和糴時楊察為三司使請用其說因輦絹四十萬匹當緡錢七十萬又

蓄見錢及擇上等茶場八總為緡錢百五十萬儲之京
師而募商人入錢並邊計其道里遠近優增其直以是
償之且省輦運之費唯入中芻豆計直償以茶如舊行
未數年論者謂輦運科折煩擾居民且商人入錢者少
芻豆虛估益高茶益賤詔翰林學士韓絳等即三司經
度絳等言自改法以來邊儲有備商旅頗通未宜輕變
唯輦運之費悉從官給而本路舊輸稅絹者毋得折為
見錢入中芻豆罷勿給茶所在平其市估至京償以銀

紬絹自是茶法不復為邊糴所須而通商之議起矣初官既榷茶民私蓄盜販皆有禁臘茶之禁又嚴於他茶犯者其罪尤重凡告捕私茶皆有賞然約束愈密而冒禁愈繁歲報刑辟不可勝數園戶困於征取官司並緣侵擾因陷罪戾至破產逃匿者歲比有之又茶法屢變歲課日削至和中歲市茶淮南纔四百二十二萬餘斤江南三百七十五萬餘斤兩浙二十三萬餘斤荆湖二百六萬餘斤唯福建天聖末增至五十萬斤詔特損五

萬至是增至七十九萬餘斤歲售錢並本息計之纔百
六十七萬二千餘緡官茶所在陳積縣官獲利無幾論
者皆謂宜弛禁便先是天聖中有上書者言茶鹽課虧
帝謂執政曰茶鹽民所食而強設法以禁之致犯者衆
顧經費尚廣未能弛禁爾景祐中葉清臣上疏曰山澤
有產天資惠民兵食不充財臣兼利草芽木葉私不得
專對園置吏隨處立筦一切官禁人犯則刑既奪其資
又加之罪黥流日報踰冒不悛誠有厚利重貨能濟國

用聖仁恤隱矜赦非辜猶將弛禁緩刑為民除害度支費用甚大權易所收甚薄剝削園戶資奉商人使朝廷有聚斂之名官曹滋虛濫之罰虛張名數刻蠹黎元建國以來法敝輒改載詳改法之由非有為國之實皆商吏協計倒持利權幸在更張倍求其羨富人豪族坐以賈贏薄販下估日皆朘削官私之際俱非遠策臣竊嘗校計茶利所入以景祐元年為率除本錢外實收息錢五十九萬餘緡又天下所售食茶并本息歲課亦祇及

三十四萬緡而茶商見通行六十五州軍所收稅錢已及五十七萬緡若令天下通商祇收稅錢自及數倍即榷務山場及食茶之利盡可籠取又况不費度支之本不置榷易之官不興輦運之勞不濫徒黥之辟臣意生民之弊有時而窮盛德之事俟聖不惑議者謂榷賣有定率征稅無彝準通商之後必虧歲計臣按管氏鹽鐵法計口受賦茶為人用與鹽鐵均必令天下通行以口定賦民獲善利又去嚴刑口數出錢人不厭取景祐元

年天下戶千二十九萬六千五百六十五丁二千六百二十萬五千四百四十一三分其一為產茶州軍內外郭鄉又居三分之一丁賦三十村鄉丁賦二十不產茶州軍郭村鄉如前計之又第損十錢歲計已及緡錢四十萬權茶之利凡止九十餘萬緡通商收稅且以三倍舊稅為率可得一百七十餘萬緡更加口賦之入乃有二百一十餘萬緡或更於收稅則例微加增益即所增至寡所聚愈厚比於官自榷易驅民就刑利病相須炳

然可察時下三司議皆以為不可行至嘉祐中著作佐郎何禹三班奉職王嘉麟又皆上書請罷給茶本錢縱園戶貿易而官收租錢與所在征算歸榷貨務以償邊糴之費可以疎利源而寬民力嘉麟為登平致頌書十卷隆衍視成策二卷上之淮南轉運副使沈立亦集茶法利害為十卷陳通商之利時富弼韓琦曾公亮執政決意嚮之力言於帝三年九月命韓絳陳升之呂景初即三司置局議之十月三司言茶課緝錢歲當入二百

二十四萬八千嘉祐二年纔及一百二十八萬又募人
入錢皆有虛數實為八十六萬而三十九萬有奇是為
本錢纔得子錢四十六萬九千而輦運靡耗喪失與官
吏兵夫廩給雜費又不與焉至於園戶輸納侵擾日甚
小民趨利犯法刑辟益繁獲利至少為弊甚大宜約至
和以後一歲之數以所得息錢均賦茶民恣其買賣所
在收算請遣官詢察利害以聞詔遣官分行六路還言
如三司使議便四年二月詔曰古者山澤之利與民共

之故民足於下而君裕於上國家無事刑罰以清自唐
建中時始有茶禁上下規利垂二百年如聞比來為患
益甚民被誅求之困日惟咨嗟官受濫惡之入歲以陳
積私藏盜販犯者實繁嚴刑重誅情所不忍是於江湖
之間幅員數千里為陷穿以害吾民也朕心惻然念此
久矣間遣使者往就問之而皆驩然願弛其禁歲入之
課以時上官一二近臣條析其狀朕猶若慊然又於歲
輸裁減其數使得饒阜以相為生俾通商利歷世之弊

一旦以除著為經常弗復更制損上益下以休吾民尚慮喜於立異之人緣而為姦之黨妄陳奏議以惑官司必寘明刑無或有貸初所遣官既議弛禁因以三司歲課均賦茶戶凡為縉錢六十八萬有奇使歲輸縣官比輸茶時其出幾倍朝廷難之為損其半歲輸縉錢三十三萬八千有奇謂之租錢與諸路本錢悉儲以待邊糴自是唯臘茶禁如舊餘茶肆行天下矣論者猶謂朝廷志於恤人欲省刑罰其意良善然茶戶困於輸錢而商

賈利薄販鬻者少州縣征稅日蹙經費不充學士劉敞
歐陽修頗論其事敞疏大要以謂先時百姓之摘山者
受錢於官而今也顧使之納錢於官受納之間利害百
倍先時百姓冒法販茶者被罰耳今悉均賦於民賦不
時入刑亦及之是良民代冒法者受罪先時大商富賈
為國懋遷而州郡收其稅今大商富賈不行則稅額不
登且乏國用修言新法之行一利而有五害大略與敞
意同時朝廷方排衆論而行之敞等雖言不聽也治平

中歲入臘茶四十八萬九千餘斤散茶二十五萬五千
餘斤茶戶租錢三十二萬九千八百五十五緡又儲本
錢四十七萬四千三百二十一緡而內外總入茶稅錢
四十九萬八千六百緡推是可見茶法得失矣自天聖
以來茶法屢易嘉祐始行通商雖議者或以為不便而
更法之意則主於優民熙寧四年神宗與大臣論昔茶
法之弊文彥博吳充王安石各論其故然於茶法未有
所變及王韶建開皇之策委以經畧七年始遣三司幹

當公事李杞入蜀經畫買茶於秦鳳熙河博馬而韶言
西人頗以善馬至邊所嗜唯茶乏茶與市即詔趨杞據
見茶計水陸運致又以銀十萬兩帛二萬五千度僧牒
五百付之假常平及坊場餘錢以著作佐郎蒲宗閔同
領其事初蜀之茶園皆民兩稅地不殖五穀唯宜種茶
賦稅一例折輸益為錢三百折輸紬絹皆一匹若為錢
十則折輸綿一兩為錢二則折輸草一圍役錢亦視其
賦民賣茶資衣食與農夫業田無異而稅額總三十萬

杞被命經度又詔得調舉官屬迺即屬諸州剏設官場歲增息為四十萬而重禁榷之令其輸受之際往往壓其斤重侵其價直法既加急矣八年杞以疾去先是杞等歲增十萬之息既而運茶積滯歲課不給即建畫於彭漢二州歲買布各十萬匹以折腳費實以布息助茶利然茶亦未免積滯都官郎中劉佐復議歲易解鹽十萬席顧運回車船載入蜀而禁商販蓋恐布亦難敷也詔既以佐代杞未幾鹽法復難行遂罷佐而宗閔乃議

川峽路民茶息收什之三盡賣於官場更嚴私交易之
令稍重至徒刑仍沒緣身所有物以待賞給於是蜀茶
盡榷民始病焉十年知彭州呂陶言川峽四路所出茶
比東南十不及一諸路既許通商兩川却為禁地虧損
治體如解州有鹽池民間煎者乃是私鹽晉州有礬山
民間煉者乃是私礬今川蜀茶園皆百姓己物與解鹽
晉礬不同又市易司籠制百貨歲出息錢不過十之二
然必以一年為率今茶場司務重立法盡榷民茶隨買

隨賣取息十之三或今日買十千之茶明日即作三千賣之變轉不休比至歲終豈止三分因奏劉佐李杞蒲宗閔等苟希進用必欲出息三分致茶戶被害始詔息止收十之一佐坐措置乖方罷以國子博士李稷代之而陶亦得罪稷依李杞例兼三司判官仍委權不限員舉劾侍御史周尹論蜀中榷茶為民害罷為提點湖北刑獄利州路漕臣張宗謗張升卿議廢茶場司依舊通商詔付稷稷方以茶利要功言宗謗等所陳皆疏謬

罪當無赦雖會赦猶皆坐貶秩二等於是稷建議賣茶
官非材許對易如閼員於前資待閼官差茶場司事州
郡毋得越職聽治又以茶價增減或不一裁立中價定
歲入課額及設酬賞以待官吏而三路三十六場大小
使臣並不限員重園戶採造黃花秋葉茶之禁犯者沒
官蒲宗閔亦援稷比許舉劾官吏以重其權二人皆務
浚利刻急茶場監官買茶精良及滿五千駄以及萬駄
第賞有差而所買麤惡偽濫者計虧坐贓論凡茶場州

軍知州通判並兼提舉經畧使所在即委通判又禁南入熙河秦鳳涇原路如私販臘茶法自熙寧十年冬推行茶法元豐元年秋凡一年通課利及舊界息稅六萬七千六十餘緡帝謂稷能推原法意日就事功宜速遷擢以勸在位遂落權發遣以為都大提舉茶場而用永興軍等路提舉常平范純粹同提舉久之用稷言徙司秦州而錄李杞前勞以子珏試將作監主簿蒲宗閔更請巴州等處產茶並用榷法五年李稷死永樂城

詔以陸師閔代之師閔言稷治茶五年百費外獲淨息
四百二十八萬餘緡詔賜田十頃而師閔權利尤刻於
前建言文階州接連而茶法不同階為禁地有博馬賣
茶場文獨為通商地乞文龍二州並禁榷仍許川路餘
羨茶貨入陝西變賣於成都府置博賣都茶場事皆施
行初羣牧判官郭茂恂言賣茶買馬事實相須詔茂恂
同提舉茶場至是師閔以買馬司兼領茶場茶法不能
自立詔罷買馬司兼領令茶場都大提舉視轉運使同

管幹視轉運判官以重其任賈種民更立茶法師閔論奏茶場與他場務不同詔並用舊條初李杞增諸州茶場自熙寧七年至元豐八年蜀道茶場四十一京西路金州為場六陝西賣茶為場三百三十二稅息至稷加為五十萬及師閔為百萬元祐元年侍御史劉摯奏疏曰蜀茶之出不過數十州人賴以為生茶司盡榷而市之園戶有茶一本而官市之額至數十斤官所給錢靡耗於公者名色不一給借保任輸入視驗皆牙僧主之

故費於牙僧者又不知幾何是官於園戶名為平市而
實奪之園戶有逃而免者有投死以免者而其害猶及
鄰伍欲伐茶則有禁欲增植則加市故其俗論謂地非
生茶也實生禍也願遣使者考茶法之弊以蘇蜀民右
司諫蘇轍繼言呂陶嘗奏改茶法止行長引令民自販
每緡長引錢百詔從其請民方有息肩之望孫迴李稷
入蜀商度盡力掊取息錢長引並行民間始不易矣且
盜賊贓及二貫止徒一年出賞五千今民有以錢八百

私買茶四十斤者輒徒一年賞三十千立法苟以自便不顧輕重之宜蓋造立茶法皆傾險小人不識事體且備陳五害呂陶亦條上利害詔付黃康體量未至摯又言陸師閔恣為不法不宜仍任事詔即罷之先是師閔提舉榷茶所行職務他司皆不得預聞事權震灼為患深密及黃康就領茶事乃請凡緣茶事有侵損戾法或措置未當及有訴訟依元豐令聽他司關送十一月蒲宗孟亦以附會李稷賣茶罷明年熙河秦鳳涇原三路

茶仍官為計置永興鄜延環慶許通商凡以茶易穀者
聽仍舊毋得踰轉運司和糴價其所博斛斗勿取息七年詔成都等路茶事司以三百萬緡為額本紹聖元年復以陸師閔都大提舉成都等路茶事而陝西復行禁榷師閔乃奏龍州仍為禁茶地凡茶法並用元豐舊條師閔自復用以訖哲宗之世其掊克之迹不若前日之著故建明亦罕見焉茶之在諸路者神宗哲宗朝無大更革熙寧八年嘗詔都提舉市易司歲賈商茶以三百

萬斤為額元祐五年立六路茶稅租錢諸州通判轉運司月暨歲終比較都數之法七年以茶隸提刑司稅務母得更易為雜稅收受紹聖四年戶部言商旅茶稅五分治平條立輸送之限既寬復慮課入無準故定以限約母得更展元祐中輒展以季課入漏失且茶稅歲計七十萬緡積十年未嘗檢察請內外委官期一年驅算以聞詔聽其議展限令出一時母承用崇寧元年右僕射蔡京言祖宗立禁榷法歲收淨利凡三百二十餘萬

貫而諸州商稅七十五萬貫有奇食茶之算不在焉其
盛時幾五百餘萬緡慶歷之後法制寢壞私販公行遂
罷禁榷行通商之法自後商旅所至與官為市四十餘
年利源寢失謂宜荆湖江淮兩浙福建七路所產茶仍
舊禁榷官買勿復科民即產茶州郡隨所置場申商人
園戶私易之禁凡置場地園戶租折稅仍舊產茶州軍
許其民赴場輸息量限斤數給短引於旁近郡縣便鬻
餘悉聽商人於榷貨務入納金銀緡錢或並邊糧草即

本務給鈔取便算請於場別給長引從所指州軍鬻之
商稅自場給長引沿道登時批發至所指地然後計稅
盡輸則在道無苛留買茶本錢以度牒末鹽鈔諸色封
椿坊場常平剩錢通三百萬緡為率給諸路諸路措置
各分命官詔悉聽焉俄定諸路措置茶事官置司湖南
於潭州湖北於荆南淮南於揚州兩浙於蘇州江東於
江寧府江西於洪州其置場所在蘄州即其州及蘄水
縣壽州以霍山開順光州以光山固始舒州即其州及

羅源大湖黃州以麻城廬州以舒城常州以宜興湖州
即其州及長興德清安吉武康睦州即其州及青溪分
水桐廬遂安婺州即其州及東陽永康浦江處州即其
州及遂昌青田蘇杭越各即其州而越之上虞餘姚諸
暨新昌剡縣皆置焉衢台各即其州而溫州以平陽大
法既定其制置節目不可毛舉四年京復議更革遂罷
官置場商旅並即所在州縣或京師給長短引自買於
園戶茶貯以籠篋官為抽盤循第叙輸息訖批引販賣

茶事益加密矣大觀元年議提舉茶事司須保驗一路所產茶色高下價直低昂而請茶短引以地遠近程以三等之期復慮商旅影挾舊引冒詐規利官吏因得擾動以御筆申飭之又以諸路再定茶息多寡或不等令后各增錢十三年計七路一歲之息一百二十五萬一千九百餘緡榷貨務再歲一百十有八萬五千餘緡京專用是以舞智固權自是歲以百萬緡輸京師所供私奉掊息益厚盜販公行民滋病矣政和二年大增損茶

法凡請長引再行者輸錢百緡即往陝西加二十茶以
百二十斤短引輸緡錢二十茶以二十五斤私造引者
如川錢引法歲春茶出集民戶約三歲實直及今價上
戶部茶籠簿並皆官製聽客買定大小式嚴封印之法
長短引輒竄改增減及新舊對帶繳納申展住賣轉鬻
科條悉具初客販茶用舊引者未嚴斤重之限影帶者
衆於是又詔凡販長引斤重及三千斤者湏更買新引
對賣不及三千斤者即用新引以一斤帶二斤鬻之而

合同場之法出矣場置於產茶州軍而簿給於都茶場
凡不限斤重茶委官司秤製毋得止憑批引為定有贏
數即沒官別定新引限程及重商旅規避秤製之禁凡
十八條若避匿抄劄及擅賣皆坐以徒復慮茶法猶輕
課入不羨定園戶私賣及有引而所賣踰數保內有犯
不告並如前鹽亭戶法短引及食茶關子輒出本路坐
以二千里流賞錢百萬重和元年詔客販輸稅檢括抵
保吏因擾民其蠲之未幾復輸稅如舊大抵茶鹽之法

主於蔡京務巧掊利變改法度前後相踰民聽眩惑初
令茶戶投狀籍於官非在籍者禁與商旅貿易未幾即
罷初限計斤重令買新引茶有贏者即及一千五百斤
須用新引貼販或止願販新茶帶賣者聽未幾以帶賣
者多又罷其令陝西舊通蜀茶崇寧二年始通東南茶
政和中陝西沒官茶令估賣繼以妨商旅下令焚棄俄
令正茶沒官者聽興販引外剩茶及私茶數以給告者
長引限以一年短引限以半歲繳納久之令已買引而

未得於園戶者期七年許民間同見緝流轉長引聽即本路住賣以二浙鹽香司有言而止其科條纖悉紛更不可勝記慮商旅疑豫茶貨不通迺重扇搖之令於時掊克之吏爭以贏羨為功朝廷亦嚴立比較之法州郡樂賞畏刑惟恐負課優假商人陵轢州郡蓋莫有言者獨邠州通判張益謙奏陝西非產茶地奉行十年未經立額歲歲比較第務增益稍或虧少程督如星州縣懼殿多前路招誘豪商增價以幸其來故陝西茶價斤有

至五六緡者或稍裁之則批改文引轉之他郡及配之
鋪戶安能盡售均及稅農民實受害徒令豪商坐享大
利言竟不行然自茶法更張至政和六年收息一千萬
緡茶增一千二百八十一萬五千一百餘斤及方臘竊
發乃詔權罷比較臘誅有司議招集園戶借貸優恤止
於文具姦臣仍用事蠹國害民又慮人言扇搖之令復
出矣清康元年詔川茶侵客茶地者以多寡差定其罪
初熙寧五年以福建茶陳積乃詔福建茶在京京東西

淮南陝西河東仍禁榷餘路通商元豐七年王子京為福建轉運副使言建州臘茶舊立榷法自熙寧榷聽通商自此茶戶售客人茶甚良官中所得惟常茶稅錢極微南方遺利無過於此乞仍舊行榷法建州歲出茶不下三百萬斤南劍州亦不下二十餘萬斤欲盡買入官度逐州軍民戶多少及約鄰路民用之數計置即官場賣嚴立告賞禁建州賣私末茶借豐國監錢十萬緡為本並從之所請均入諸路榷賣委轉運司官提舉福建

王子京兩浙許懋江東杜偉江西朱彥博廣東高鑄然
子京益未免抑配於民時遠方若桂州脩仁諸縣夔州
路達州有司皆議榷茶言利者踵相躡然神宗聞郢州
失催茶稅輒蠲之建州園戶等以茶麤濫當剥納為錢
三萬六千餘緡慮其不能償令準輸茶初成都帥司蔡
延慶言邛部川蠻主苴尅等願賣馬即詔延慶以茶招
來後聞邊計蠻情非便即罷之哲宗嗣位御史安惇首
劾王子京買臘茶抑民詔罷子京事任令福建禁榷州

軍視其舊餘並通商桂州修仁等縣禁榷及陝西碎賣
芽茶皆罷崇寧二年尚書有言建劍二州茶額七十餘
萬斤近歲增盛而本錢多不繼詔更給度牒四百仍給
以諸色封椿繼詔商旅販臘茶蠲其稅私販者治元售
之家如元豐之制臘茶舊法免稅大觀三年措置茶事
始收焉四年私販勿治元售之家如元符令政和初復
增損為新法三年詔免輸短引許依長引於諸路住賣
後末骨茶每長引增五百斤短引倣此諸路監司州郡

公使食茶禁私買聽依商旅買引六年詔福建茶園如
鹽田量土地產茶多寡依等第均稅重和元年以改給
免稅新引重定福建末茶斤重長引以六百斤為率元
豐中宋用臣都提舉汴河隄岸剏奏脩置水磨凡在京
茶戶擅磨末茶者有禁並許赴官請買而茶鋪入米豆
雜物揉和者募人告一兩賞三千及一斤十千至五十
千止商賈販茶應往府界及在京師須令產茶山場州
軍給引並赴京場中賣犯者依私販臘茶法諸路末茶

入府界者復嚴為之禁訖元豐末歲獲息不過二十萬商旅病焉元祐初寬茶法議者欲罷水磨戶部侍郎李定以失歲課持不可廢侍御史劉摯右司諫蘇轍等相繼論奏遂罷紹聖初章惇等用事首議修復水磨乃詔即京索大源等河為之以孫迴提舉復命兼提舉汴河隄岸四年場官錢景逢獲息十六萬餘緡呂安中二十一萬餘緡以差議賞元符元年戶部上凡獲私末茶并雜和者即犯者未獲估價給賞並如私臘茶獲犯人法

雜和茶宜棄者斤特給二十錢至十緡止初元豐中修
置水磨止於在京及開封府界諸縣未始行於外路及
紹聖復置其後遂於京西鄭滑潁昌府河北澶州皆行
之又將即濟州山口營置崇寧二年提舉京城茶場所
奏紹聖初興復水磨歲收二十六萬餘緡四年於長葛
等處京索澗水河增修磨二百六十餘所自輔郡榷法
罷遂失其利請復舉行從之尋詔商販臘茶入京城者
本場盡買之其翻引出外者收堆梁錢裁元豐制更立

新額歲買山場草茶以五百萬斤為率客茶至京者許官場買十之三即索價故高驗元引買價量增三年詔罷之明年改令磨戶承歲課視酒戶納麴錢法五年復罷民戶磨茶官用水磨仍依元豐法應緣茶事併隸都提舉汴河堤岸司大觀元年改以提舉茶事司為名尋命茶場茶事通為一司三年復撥隸京城所一用舊法政和元年京城所請商旅販茶起引定入京住賣者即許借江入汴如元豐舊制其借江入汴却指他路住賣

者禁已請引者並令赴京二年以課入不登商賈留滯
詔以其事歸尚書省於是尚書省言水磨茶自元豐初
立止行於近畿昨乃分配諸路以故至弊欲止行於京
城仍行通客販餘路水磨並罷從之四年收息四百萬
貫有奇比舊三倍遂勅月進高宗建炎初於真州印鈔
給賣東南茶鹽當是時茶之產於東南者浙東西江東
西湖南北福建淮南廣東西路十州六十有六縣二百
四十有二雪川顧渚生石上者謂之紫笋毗陵之陽羨

紹興之日鑄婺源之謝源隆興之黃龍雙井皆絕品也
建炎三年置行在都茶場罷合同場十有八惟洪江興
國潭建各置場一監官一罷食茶小引捕私茶法視捕
私鹽二十一年秦檜等始進茶鹽法先是臣僚或因事
建明朝廷亦因時損益至是審訂成書上之孝宗隆興
二年淮東宣諭錢端禮言商販長引茶水路不許過高
郵陸路不許過天長如願往楚州及盱眙界引貼輸翻
引錢十貫五百文如又過淮北貼輸亦如之當是時商

販自榷場轉入虜中其利至博譏禁雖嚴而民之犯法
者自若也乾道二年戶部言商販至淮北榷場折博除
輸翻引錢更輸通貨僧息錢十一緡五百文八年減輸
翻引錢止七緡通貨僧息錢止八緡淳熙二年以長短
茶引權以半依原引斤重錢數分作四緡小引印給而
翻引貼輸錢隨小引輸送光宗紹熙初漳州守臣朱熹
奏除屬邑科茶七千餘緡臣僚申明長短小引相兼從
人之便戶部言給賣小引除金銀會子分數入輸餘願

專以會子筭請者聽寧宗嘉泰四年知隆興府韓邈奏
請隆興府惟分寧縣產茶他縣無茶而豪民武斷者乃
請引窮索一鄉使認茶租非便於是禁非產茶縣不許
民擅認茶租建寧臘茶北苑為第一其最佳者曰社前
次曰火前又曰雨前所以供玉食備賜予太平興國始
置大觀以後製愈精數愈多膀式屢變而品不一歲貢
片茶二十一萬六千斤建炎以來葉濃楊勍等相因為
亂園丁亡散遂罷之紹興二年蠲未起大龍鳳茶一千

七百二十八斤五年復減大龍鳳及京鉅之半十二年
興榷場遂取臘茶為榷場本凡胯截片鉅不以高下多
少官盡榷之申嚴私販入海之禁議者請鬻建茶於臨
安移茶司事於建州買發明年以失陷引錢復令通商
自是上供龍鳳京鉅茶料凡製作之費筐笥之式令漕
司專之蜀茶之細者其品視南方已下惟廣漢之趙坡
合州之水南峨眉之白牙雅安之蒙頂土人亦珍之但
所產甚微非江建比也舊無榷禁熙寧間始置提舉司

收歲課三十萬至元豐中累增至百萬建炎元年成都轉運判官趙開言榷茶買馬五害請用嘉祐故事盡罷榷茶而令漕司買馬或未能然亦當減額以蘇園戶輕價以惠行商如此則私販衰而盜賊息遂以開同主管川秦茶馬二年開至成都大更茶法倣蔡京都茶場法以引給茶商即園戶市茶百斤為一大引除其十勿筭置合同場以譏其出入重私商之禁為茶市以通交易每斤引錢春七十夏五十市利頭子錢不預焉所過征

一錢所止一錢五分自後引息錢至一百五萬緡至十
七年都大茶馬韓球盡取園戶加饒之茶為額茶司歲
收二百萬而買馬之數不加多乾道末年青羌作亂茶
司增長細馬名色等錢歲三十萬淳熙六年以後累減
園戶重額錢十六萬又減引息錢十六萬至紹熙初楊
輔為使遂定為法成都府利州路二十三場歲產茶二
千一百二萬斤通博馬物帛歲收錢二百四十九萬三
千餘緡朝廷歲以一百一十三萬緡隸總領所贍軍然

茶馬司率多難之乾道以後歲撥止一二十萬緡至淳熙十年遂以五十萬緡為準自熙豐以來茶司官榷出諸司之上初元豐開川秦茶場園戶既輸二稅又輸土產隆安縣園戶二稅土產兼輸外又催理茶課估錢建炎元年立為額至寧宗慶元初始除之六年詔四川產茶處歲輸經總制頭子錢五千四十一道有奇又科租錢三千一百四十道有奇宋初經理蜀茶置互市于原渭德順三郡以市蕃夷之馬熙寧間又置場于熙河南

渡以來文黎珍叙南平長寧階和凡八場其間盧甘蕃
馬歲一至焉洮州蕃馬或一月或兩月一至焉疊州蕃
馬或半年或三月一至焉皆良馬也其他諸蕃馬多駑
大率皆以互市為利宋朝曲示懷遠之恩亦以是羈縻
之紹興二十四年復黎州及雅州碉門靈犀砦易馬場
乾道初川秦八場馬額九千餘匹淳熙以來為額萬二
千九百九十四匹自後所市未嘗及焉

宋史卷一百八十四

宋史卷一百八十四 考證

食貨志下六因奏劉佐李杞蒲宗闕等○闕應作閔
蒲宗孟亦以附會李稷賣茶罷○孟應作閔

宋史卷一百八十四 考證

欽定四庫全書叢要卷五千八百十三

史部

宋史卷一百八十五

元中書右丞相總裁托克托等修

食貨志第一百三十八

食貨下七

攀酒

九

香附治

酒宋榷酤之法諸州城內皆置務釀酒縣鎮鄉閭或許
民釀而定其歲課若有遺利所在多請官酤三京官造

麴聽民納直以取陳滑蔡頴隨郢鄧金房州信陽軍舊

皆不榷太平興國初京西轉運使程能請榷之所在置官吏局署取民租米麥給釀以官錢市薪槱及吏工奉料歲計獲無幾而主吏規其盈羨又醞齊不良酒多醨薄至課民婚葬量戶大小令酤民甚被其害歲儉物貴殆不償其費太宗知其弊淳化五年詔募民自釀輸官錢減常課三之二使其易辦民有應募者檢視其貲產長吏及大姓共保之後課不登則均償是歲取諸州歲課錢少者四百七十二處募民自酤或官賣麴收其直

其後民應募者寡猶多官釀陝西雖榷酤而尚多遺利
咸平五年度支員外郎李士衡請增課以助邊費乃歲
增十一萬餘貫兩浙舊募民掌榷雍熙初以民多私釀
歲蠲其禁其權酤歲課如麴錢之制附兩稅均率二年
詔曰有司請罷杭州榷酤乃使豪舉之家坐專其利貧
弱之戶歲責所輸本欲惠民乃成侵擾宜仍舊榷酒罷
納所均錢天禧四年轉運副使方仲荀言本道酒課舊
額十四萬貫遺利尚多乃歲增課九萬八千貫川峽承

舊制賣麴價重開寶二年詔減十之二既而頗興榷酤
言事者多陳其非便太平興國七年罷仍舊賣麴自是
惟夔建開施廬黔涪黎威州梁山雲安軍及河東之麟
府州荆湖之辰州福建之福泉汀漳州興化軍廣南東
西路不禁自春至秋醅成即鬻謂之小酒其價自五錢
至三十錢有二十六等臘釀蒸鬻候夏而出謂之大酒
自八錢至四十八錢有二十三等凡醞用粳糯粟黍麥
等及麴法酒式皆從水土所宜諸州官釀所費穀麥準

常糴以給不得用倉儲酒匠役人當受糧者給錢凡官
麴麥一斗為麴六斤四兩賣麴價東京南京斤直錢百
五十五西京減五咸平末江淮制置增榷酤錢頗為煩
刻景德二年詔母增榷自後制置使不得兼領酒榷四
年又詔中外不得更議增課以圖恩獎天禧初著作郎
張師德使淮南上言鄉村酒戶年額少者望並停廢從
之至道二年兩京諸州收榷課銅錢一百二十一萬四
千餘貫鐵錢一百五十六萬五千餘貫京城賣麴錢四

十八萬餘貫天禧末榷課銅錢增七百七十九萬六千
餘貫鐵錢增一百三十五萬四千餘貫麴錢增二十九
萬一千餘貫五代漢初犯麴者並棄市周至五斤者死
建隆二年以周法太峻犯私麴至十五斤以私酒入城
至三斗者始處極刑餘論罪有差私市酒麴者減造人
罪之半三年再下酒麴之禁戶私造差定其罪城郭二
十斤鄉閭三十斤棄市民持私酒入京城五十里西京
及諸州城二十里者至五斗處死所定里數外有官署

酷酒而私酒入其地一石棄市乾德四年詔比建隆之
禁第減之凡至城郭五十斤以上鄉閭百斤以上私酒
入禁地二石三石以上至有官署處四石五石以上者
乃死法益輕而犯者鮮矣端拱二年令民買麴釀酒酷
者縣鎮十里如州城二十里之禁天聖以後北京售麴
如三京法官售酒麴亦畫疆界戒相侵越犯皆有法其
不禁之地大槩與宋初同唯增永興軍大通監川峽之
茂州富順監時天下承平既久戶口寢蕃為酒醪以靡

穀者益衆乾興初言者謂諸路酒課月比歲增無有藝
極非古者禁羣飲教節用之義遂詔鄉村毋得增置酒
場已募民主之者期三年他人雖欲增課以售勿聽主
者自欲增課委官吏度異時不至虧額負課然後上聞
既而御史中丞晏殊請酒場利薄者悉禁增課天聖七
年詔民間有吉凶事酤酒舊聽自便母抑配而江淮荆
湖兩浙酒戶往往豪制良民至出引目抑使多售其嚴
禁止犯者聽人告募人代之慶歷初三司言陝西用兵

軍費不給尤資榷酤之利請較監臨官歲課增者第賞
之繼令蕭定基王琪等商度利害初酒場歲課不登州
縣多責衙前或伍保輸錢以亢其數嘉祐治平中數戒
止之治平四年手詔蠲京師酒戶所負榷錢十六萬緡
又江南比歲所增酒場強率人酤酒者禁止皇祐中酒
麴歲課合緡錢一千四百九十八萬六千一百九十六
至治平中減二百一十二萬三千七百三而皇祐中又
入金帛絲綢芻粟材木之類總其數四百萬七百六十

治平中乃增一百九十九萬一千九百七十五熙寧三年詔諸郡遇節序毋得以酒相饋初知渭州蔡挺言陝西有醞公使酒交遺至踰二十驛道路煩苦詔禁之至是都官郎中沈行復言知莫州柴貽範饋他州酒至九百餘瓶用兵夫踰一百人故并諸路禁焉四年三司承買酒麴坊塲錢率千錢稅五十儲以祿吏六月令式所刪定官周直孺言在京麴院酒戶鬻酒虧額原於麴數多則酒亦多多則價賤賤則人戶損其利為今之法宜

減數增價使酒有限而必售則人無耗折之患而官額
不虧請以百八十萬斤為定額閏年增十五萬斤舊直
斤百六十八百以八十五為數後增為二百百用省數
以便入出七年諸郡舊不釀酒者許釀以公使錢率百
緡為千石溢額者以違制論在京酒戶歲用糯三十萬
石九年江浙災傷米直騰貴詔選官至所產地預給錢
俟成稔折輸於官未幾詔勿行止以所糴在京新米與
已糴米半用之元豐元年增在京酒戶麪錢較年額損

麵三十萬斤閏年益造萬斤二年詔在京鬻麵歲以百二十萬斤為額斤直錢二百五十俟鬻及舊額令復舊價酒戶負糟糯錢更期以二年帶輸并蠲未請麵數十萬斤先是京師麵法自熙寧四年更定後多不能償雖屢閣未請麵數及損歲額為百五十萬斤斤增錢至二百四十未免逋負至是命畢仲衍與周直孺講求利病請損額增直均給七十店令日輸錢周歲而足月輸不及數計所負倍罰其炊醞非時擅益器量及用私麵皆

立告賞法悉施行之而裁其價三年詔帶輸舊麴錢及倍罰錢仍寬以半歲未經免罰者蠲三之一五年外居宗室酒止許於舊宮院尊長及近屬寄醞增永興軍乾祐縣十酒場酒戶負糟糯錢更令三年之內增月限以輸並除限內罰息其倍罰麴錢已蠲三之下戶更免一分元祐元年刪監司鬻酒及三路饋遺條紹聖二年左司諫翟思言諸郡釀酒非沿邊並復熙寧之數詔熙寧五年以前諸郡不釀酒及有公使錢而無酒者所釀

並依熙寧編敕數仍令諸郡所減勿逾百石舊不及數者如舊母得於例外供饋後又以陝西沿邊官監酒務課入不足乃令邊郡非帥府並酌條制定釀酒數諸將并城砦止許於官務寄釀崇寧二年知連水軍錢景允言建立學舍請以承買醋坊錢給用詔常平司計無害公費如所請仍令他路準行之初元祐臣僚請罷榷醋戶部謂本無禁文後翟思請以諸郡醋坊日息用餘悉歸常平至是景允有請故令常平計之十月諸路官鹽

酒直上者升增錢二中下增一以充學費餘裨轉運司歲用大觀四年以兩浙轉運司之請官監鬻糟錢別立額比較又詔諸郡榷酒之池出入酒米並別遣倉官賣醋母得越郡城五里外凡縣鎮村並禁其息菑歸轉運司舊屬常平者如故政和二年淮南發運副使董正封言杭州都酒務甲於諸路治平前歲課三十萬緡今不過二十萬請令分務為三更置比較務二母增官吏兵匠仍請本路諸郡並增務比較從之四年兩浙轉運司

亦請置務比較定課額釀酒收息以增虧為賞罰詔酒務官二員者分兩務三員者復增其一員雖多毋得過四務內有官雖多而課息不廣者聽如舊是歲以湖南路諸務糟醡錢分入提舉司令斤增錢三為直達糧綱水工之費立酒匠闕聽選試清務廟軍之法清務者本州選刺供踏麴釀蒸之役闕則募人以充宣和二年公使庫假用米麴及因耗官課者以坐贓罪之監官移替三年發運使陳遘奏江淮等路官監酒直上者升權增

錢五次增三為江浙新復州縣之用其後尚書省請令
他路悉行之詔如其請所收率十之三以給漕計餘輸
大觀庫五年罷夔路榷酤未幾復舊以轉運司言新邊
城砦藉以供億故也六年在任官以奉酒抑賣坊戶轉
鬻者論以違制律先是政和未嘗詔母得令人置肆以
鬻今併禁之諸路增酒銕如元豐法悉克上供為戶部
用母入轉運司七年諸路鬻醋息率十五為公使餘如
鈔旁法令提刑司季具儲備之數母得移用靖康元年

兩浙路酒價屢增較熙豐幾倍而歲稔米麴直賤民規利輕冒法遂令罷所增價渡江後屈於養兵隨時增課名目雜出或主於提刑或領於漕司或分隸於經總制司惟恐軍資有所未裕建炎三年總領四川財賦趙開遂大變酒法自成都始先罷公帑實供給酒即舊撲買坊場所置隔釀設官主之民以米入官自釀斛輸錢三十頭子錢二十二明年徧下其法於四路歲遞增至六百九十餘萬緡凡官槽四百所私店不預焉於是東南

之酒額亦日增矣四年以米麴價高詔上等升增二十
文下等升增十八文俟米麴價平依舊紹興元年兩浙
酒坊於買撲上添淨利錢五分季輸送戶部又增諸酒
錢上升二十文下十文其諸州軍賣酒虧折隨宜增價
一分州用一分漕計一分隸經制司先是酒有定價每
增須上請是後郡縣始自增而價不一矣五年令諸州
酒不以上下升增五文隸總制司六年以紹興二年以
後三年中一年中數立額其增羨給郡縣用罷四川州

軍縣鎮酒官百七員其酒息微處並罷之七年以戶部尚書章誼等言行在置贍軍酒庫四川制置使胡世將即成都潼川資普廣安立清酒務許民買撲歲為錢四萬八千餘緡自趙開行隔槽法增至十四萬六千餘緡紹興元年及世將改官監所入又倍自後累增至五十四萬八千餘緡紹興二十五年而外邑及民戶坊塲又為三十九萬緡淳熙二年然隔槽之法始行聽就務分槽醞賣官計所入之米而收其課若未病也行之既久醞賣虧欠則責入

米之家認輸不復覈其米而第取其錢民始病矣十年
罷措置贍軍酒庫所官吏悉歸戶部以左曹郎中兼領
以點檢贍軍酒庫為名與本路漕臣共其事十五年弛
夔路酒禁以南北十一庫並充贍軍激賞酒庫隸左右
司十七年省四川清酒務監官成都府二員興元遂寧
府漢綿邛蜀彭簡果州富順監并漢州綿州縣各一員
二十一年詔諸軍買撲酒坊監官賞格依舊

四萬三萬
貫已上場務增及

務增及一倍減一年磨勘二倍減二年磨勘三倍減三年磨勘四倍減四年磨勘二萬一萬貫已上場務增及

一倍減三季磨勘二倍減一年磨勘三倍減二年磨勘
七千貫已上場務增及一倍升三季名次二倍減一年
磨勘三倍減一年半磨勘四倍減二年磨勘七千貫已
下場務增及一萬貫減一年磨勘二萬貫減二年磨勘
三萬貫減三年磨勘四萬貫減四年磨勘二十五年罷諸路漕司寄造酒二
十七年以隔槽酒擾民許買撲以便民罷官監後復置
之三十年以點檢措置贍軍酒庫改隸戶部既而戶部
侍郎邵大受等言歲計賴經總制窠名至多今諸路歲
虧二百萬皆緣諸州公使庫廣造別置店酤賣以致酒
務例皆敗壞詔罷諸州別置酒庫如軍糧酒庫防月庫

月椿庫之類并省務寄造酒及帥司激賞酒庫凡未分
隸經總制錢處並立額分隸補趨虧額三十一年殿帥
趙密以諸軍酒坊六十六歸之戶部見九同安郡王楊
存中罷殿帥復以私撲酒坊九上之歲通收息六十萬
緡有奇以十分為率七分輸送行在三分給漕計蓋自
軍興以來諸帥擅權酷之利由是縣官始得資之以佐
經費焉孝宗乾道元年以浙東西犒賞庫六十四隸三
衙輸課於左藏南庫餘錢充隨年贍軍及造軍器二年

詔臨安府安撫司酒庫悉歸贍軍并贍軍諸庫及臨安府安撫司酒務令戶部取三年所收一年中數立額日售錢萬緡歲收本錢一百四十萬息錢一百六十萬麴錢二萬羨餘獻以內藏者又二十萬其後增為五十萬四年立場務官賞格七年以淮西總領周閎言總所庫四安撫司庫五都統司庫十八馬軍司庫一增置行宮庫一共為庫二十九以三年最高年為額其行宮新庫息錢除分認諸處錢及糜費以淨息三分為率一分輸

御前酒庫以提領建康府戶部贍軍酒庫為名遂鑄印
及改庫名八年知常德府劉邦瀚言江北之民困於酒
坊至貧乏家不捐萬錢則不能舉一吉凶之禮乃檢乾
道重修敕令申嚴抑買之禁淳熙三年詔四川酒課折
估因弊可減額錢四十七萬三千五百餘緡令禮部給
降度牒六百六十一道補還今歲減數明年於四川合
給湖廣總所錢補之寧宗開禧元年知臨安府兼點檢
贍軍激賞庫趙善防轉運判官提領戶部犒賞酒庫詹

徽之言官吏冗費請諸司官屬兼管明年又以都省言
課額失陷依舊辟置初趙開之立隔槽法也蓋以紓一
時之急其後行之諸郡國家贍兵郡縣經費率取給於
此故雖罷行增減不一而足而其法卒不可廢云

阬冶凡金銀銅鐵鉛錫監治場務二百有一金產商饒
歙撫四州南安軍銀產鳳建桂陽三州有三監饒信虔
越衢處道福汀漳南劖韶廣英連恩春十七州建昌邵
武南安三軍有五十一場秦隴興元三州有三務銅產

饒處建英信汀漳南劖八州南安邵武二軍有三十五
場梓州有一務鐵產徐兗相三州有四監河南鳳翔同
虢儀蘄黃袁英九州興國軍有十二冶晉磁鳳澧道渠
合梅陝耀坊虔汀吉十四州有二十務信鄂連建南劖
五州邵武軍有二十五場鉛產越建連英春韶衡汀漳
南劖十州南安邵武二軍有三十六場務錫產河南南
康虔道賀潮循七州南安軍有九場水銀產秦階商鳳
四州有四場朱砂產商宜二州富順監有三場開寶三

年詔曰古者不貴難得之貨後代賦及山澤上加侵削
下益彫弊每念茲事深疚于懷未能捐金於山豈忍奪
人之利自今桂陽監歲輸課銀宜減三分之一民鑄銅
為佛像浮圖及人物之無用者禁之銅鐵不得闢出蕃
界及化外至道二年有司言定州諸山多銀礦而鳳州
山銅礦復出採鍊大獲而皆良焉請置官署掌其事太
宗曰地不愛寶當與衆庶共之不許東西川監酒商稅
課半輸銀帛外有司請令二分八金景德三年詔以非

土產罷之天聖中登萊採金歲益數千兩仁宗命獎勸
官吏宰相王曾曰採金多則背本趨末者衆不宜誘之
景祐中登萊饑詔弛金禁聽民採取俟歲豐復故然是
時海內承平已久民間習俗日漸侈靡糜金以飭服器
者不可勝數重禁莫能止焉景祐慶歷中屢下詔申敕
之語在輿服志大率山澤之利有限或暴發輒竭或採
取歲久所得不償其費而歲課不足有司必責主者取
盈仁宗英宗每降赦書輒委所在視治之不發者或廢

之或蠲主者所負歲課率以為常而有司有請亦輒從之無所吝故治之興廢不常而歲課增損隨之皇祐中歲得金萬五千九十五兩銀二十一萬九千八百二十九兩銅五百一十萬八百三十四斤鐵七百二十四萬一千斤鉛九萬八千一百五十一斤錫三十三萬六百九十五斤水銀二千二百斤其後以赦書從事或有司所請廢治百餘既而山澤興廢至治平中或增治或復故者六十有八而諸州阨治總二百七十一登萊商饒

汀南恩六州金之治十一登號秦鳳商隴越衢饒信虔
郴衡漳汀泉建福南劍英韶連春二十三州南安建昌
邵武三軍桂陽監銀之治八十四饒信虔建漳汀南劍
泉韶英梓十一州邵武軍銅之治四十六登萊徐充鳳
翔陝儀邢號磁虔吉袁信澧汀泉建南劍英韶渠合資
二十四州興國邵武二軍鐵之治七十七越衢信汀南
劍英韶春連九州邵武軍鉛之治三十商號虔道賀潮
循七州錫之治十六而水銀丹砂州治與至道天禧之

時則一皆置吏主之是歲視皇祐金減九千六百五十六銀增九萬五千三百八十四銅增一百八十七萬鐵錫場百餘萬鉛增二百萬又得丹砂二千八百餘斤獨水銀無增損焉熙寧元年詔天下寶貨院治不發而負歲課者蠲之八年令近院治坊郭鄉村并淘採烹鍊人並相為保保內及於院治有犯知而不糾或停盜不覺者論如保甲法元豐元年諸院治金總收萬七百一十九銀二十一萬五千三百八十五兩銅千四百六十萬

五千九百六十九斤鐵五百五十萬一千九十七斤鉛
九百十九萬七千三百三十五斤錫二百三十二萬一
千八百九十八斤水銀三千三百五十六斤朱砂三千
六百四十六斤十四兩有奇先是熙寧七年廣西經畧
司言邕州右江填乃洞產金請以鄧闢監金場後五年
凡得金為錢二十五萬緡闢遷官者再焉元豐四年始
以所產薄罷貢而虔吉州界鉛悉禁之七年戶部尚書
王存等請復開銅禁各展磨勘年有差是歲阮治凡一

百三十六所領於虞部紹聖元年戶部尚書蔡京奏岑
水塲銅額浸虧而商號間苗脉多陝民不習京採久廢
不發請募南方善工詣陝西經畫擇地興治於是許
天啓同管幹陝西阨治事元符三年天啓罷領阨治以
其事歸之提刑司初新舊阨治合為一司而漕司兼領
天啓為同管幹欲專其事慮有所牽制乃請川陝京西
路阨治自為一司許檢束州縣刺舉官吏而漕司不復
兼阨治至是中書奏天啓所領首末六歲總新舊銅止

收二百六萬餘斤而兵匠等費繁多故罷之崇寧元年
提舉江淮等路銅事游經言信州贍銅古院二一為贍
水浸銅工少利多其水有限一為贍土煎銅無窮而為
利寡計置之初宜增本損息浸銅斤以錢五十為本煎
銅以八十詔用其言諸路院治自川陝京西之外並令
常平司同管幹所收息薄而煩官監者如元符紹聖敕
立額許民封狀承買四年湖北旺溪金場以歲收金千
兩乃置監官廣東漕臣王覺自言嘗領常平講求山澤

之利岑水一場去年收銅比租額增三萬九千一百斤
較之常年亦增六十六萬一千斤遂增其秩是歲山澤
阨治名數令監司置籍非所當收者別籍之若弛興廢
置移併亦令具注上於虞部大觀二年詔金銀阨發雖
告言而方檢視私開淘取者以盜論阨治舊不隸知縣
縣丞者並令兼監賞罰減正官一等有治地知縣月一
行點閱言者論其職在宣導德澤平征賦獄訟不宜為
課利走山谷間遂已之八月提舉陝西阨治司改併入

轉運司政和元年張商英言湖北產金非止辰沅靖溪
峒其峽州夷陵宜都縣荆南府枝江江陵縣赤湖城至
鼎州皆商人淘採之地漕司既乏本錢提舉司買止千
兩且無專司定額請置專切提舉買金司有金苗無官
監者許遣部內州縣官及使臣掌幹詔提舉官措畫以
聞仍於荆南置司廣東漕司復奏端州高明惠州信上
立溪場皆宜停閉韶州曹峒場英州銀岡場皆併入英
之清溪場惟黃坑場欲權存俟歲終會所入別奏惠州

楊梅東院康州雲列潮州豐政連州元魚銅院黃田白
寶廣州大利宜祿韶州伍注岑水銅岡循州大佐羅翊
英州鍾銅凡十六場請並如舊循之夜明英之竹溪韶
之思溪連之同安請更遣攝官從之三年尚書省言陝
西路院治已遣官吏提轄措置川路金銀院治興廢慮
失利源詔令陝西措置官兼行川路事院治所收金銀
銅鉛錫鐵水銀朱砂物數令工部置籍籤注歲半消補
上之尚書省自是戶工部尚書省皆有籍鈎考然所憑

唯帳狀至有有額而無收有收而無額乃責之縣丞監官及曹部奉行者而更督邇年違負之數九月措置陝西阨治蔣彞奏本路阨治收金千六百兩他物有差詔輸大觀西庫彞增秩官屬各減磨勘年四年令監司遣官同諸縣丞遍視阨治之利為圖籍簽注監司覆實保奏議遣官再覆酌重輕加賞異同脫漏者罪之六年川陝路各置提轄措置阨治官劉芑計置萬永州產金一歲收二千四百餘兩特與增秩十二月廣東漕司言本

路鐵場院治九十二所歲額收鐵二百八十九萬餘斤
浸銅之餘無他用詔令官悉市以廣浸仍以諸司及常
平錢給本尚書省奏五路院治已有提轄措置專司及
淮南湖北廣東西亦監司領其餘路請並令監司領之
於是江東西福建兩浙漕臣皆領院治七年提舉東南
九路院治徐禋奏太平瑞應史不絕書令部內山澤院
治若或希世珍物及古寶器請赴書藝局上進蓋自政
和初京西漕臣王璿奏太和山產水精知桂州王覺奏

枕門等處產金及生花金田提轄京西阨治王景文奏
汝州青嶺鎮界產瑪瑙其後湟州界蕃官結彪地內金
阨千餘收生熟金四等凡百三十四兩有奇蔡京請宣
付史館帥百官表賀故禋復有是請焉是時河北京東
西及徐禋所領九路興修阨治類鑿空擾下抑州縣承
額於是降黜河北提轄官遣廉訪使者鄭諶并諸路廉
訪悉究陳利病真偽八月中書奏阨治寢已即緒詔京
東西河北路并提舉東南九路阨治並罷十一月尚書

省言徐禋以東南黑鉛留給鼓鑄之餘悉造丹粉鬻以濟用詔諸路常平司以三十萬輸大觀西庫餘從所請明年令諸路鐵倅茶鹽法權鬻置鑪冶收鐵給引召人通市苗脉微者聽民出息承買以所收中賣於官私相貿易者禁之先是元豐六年京東漕臣吳居厚奏徐鄆青等州歲製軍器及上供簡鐵之類數多而利國茱蕪二監鐵少不能給請鐵從官興煽所獲可多數倍自是官榷鐵造器用以鬻於民至元祐罷之其後大觀初入

內皇城使裴絢為涇原幹當奏上渭州通判苗冲淑之
言石河鐵冶既令民自採鍊中賣於官請禁民私相貿
易農具器用之類悉官為鑄造其冶坊已成之物皆以
輸官而償其直乃禁母得私相貿易農具器用勿禁官
自賣鐵唯許鑄鬻戶市之政和初臣僚言鹽鐵利均今
鹽筴推行已備而鐵貨尚未講畫請即治戶未償之錢
收其已鍊之鐵為器鬻之兼京東二監所出尤多河北
固鎮等治並官監其利不貲而河東鐵炭最盛若官榷

為器以贍一路旁及陝雍利入甚廣且以銷盜鑄之弊
又夏人茶山鐵治既入中國乏鐵為器聞以鹽易鐵錢
於邊若官自為器則鐵與錢俱重可伐其謀請榷諸路
鐵擇其最盛者可置監設官總之槩諸路不越數十處
餘止為鑄瀉之地屬之都監或監當官兼領凡農具器
用皆官鑄造表以字號官本之餘取息二分以上仍置
鐵引以通諸路儲其錢助三路鈔本詔戶部下諸路漕
臣詳度會次年廣東路請以可監之地如舊法收其淨

利苗脉微者召人承買官不榷取遂併諸路詳度之旨
不行至是臣僚復以為言故嚴貿易之禁而鐵利盡榷
於官然農具器用從民鑄造卒如舊法四月廣東廉訪
黃烈等言廣惠英康韶州興慶府政和中寶貨司立院
治金銀等歲額或苗脉微或無人承買而浮冗之人虛
託其名發毀民田騷動邀販詔政和六年所立額並罷
舊有苗脉可給歲課者如故十一月復諸路元罷提舉
院治官其江南路仍令江西漕臣劉蒙同措置宣和元

年石泉軍江溪沙磧麌金許民隨金脉淘採立課額或以分數取之十月復置相州安陽縣銅冶村監官先是詔留邢州綦村磁州固鎮兩治餘剏置治並罷而常平司謂銅冶村近在河北得利多故有是命六年詔阨治之利二廣為最比歲所入稽之熙豐十不逮一令漕臣鄭良提舉經畫分任官屬典掌計置取元豐以來歲入多數立額定為常賦阨治司母預焉時江淮荆浙等九路阨治凡二百四十五鑄錢院監十八歲額三百餘萬

縉五月詔阨治舊隸轉運司者如熙豐紹聖法崇寧以後隸常平司者如崇寧法其江淮等路阨治官屬熙豐員數餘路官屬並罷仍令中書選提點官靖康元年諸路阨治苗礦既微或舊有今無悉令蠲損凡民承買金場並罷宋初舊有阨治官置場監或民承買以分數中賣於官初隸諸路轉運司本錢亦資焉其物悉歸之內帑崇寧已後廣搜利穴榷賦益備凡屬之提舉司者謂之新阨治用常平息錢與剩利錢為本金銀等物往

往皆積之大觀庫自蔡京始政和間數罷數復然告發之地多壞民田承買者立額重或舊有今無而額不為損欽宗即位詔悉罷之南渡阤治廢興不常歲入多寡不同今以紹興三十二年金銀銅鐵鉛錫之治廢興之數一千一百七十及乾道二年鑄錢可比較所入之數附之湖南廣東江東西金冶二百六十七廢者一百四十二湖南廣東福建浙東廣西江東西銀冶一百七十四廢者八十四潼川湖南利州廣東浙東廣西江東西

福建銅治一百九廢者四十五舊額歲七百五萬七千
二百六十斤有奇乾道歲入二十六萬三千一百六十
斤有奇淮西夔州成都利州廣東福建浙東廣西江東
西鐵冶六百三十八廢者二百五十一舊額歲二百一
十六萬二千一百四十斤有奇乾道歲入八十八萬三
百斤有奇淮西湖南廣東福建浙東江西鉛治五十二
廢者一十五舊額歲三百二十一萬三千六百二十斤
有奇乾道歲入一十九萬一千二百四十斤有奇湖南

廣東江西錫冶一百一十八廢者四十四舊額歲七十
六萬一千二百斤有奇乾道歲入二萬四百五十斤有
奇宋初諸治外隸轉運司內隸金部崇寧二年始隸右
曹建炎元年復隸金部轉運司隆興二年阨治監官歲
收買金及四千兩銀及十萬兩銅錫及四十萬斤鉛及
一百二十萬斤者轉一官守倅部內歲比租額增金一
萬兩銀十萬兩銅一百萬斤亦轉一官令丞歲收買及
監官格內之數減半推賞慶元二年宰執言封椿銀數

比淳熙末年虧額幾百五十萬今務場所入歲不滿三十萬而歲奉三宮及冊寶費約四十萬恐愈侵銀額欲權以三分為率一分支銀二分支會子上曰善端平三年赦曰諸路州縣阨治興廢在觀寺祠廟公宇居民墳地及近墳園林地者在法不許人告亦不得受理訪聞官司利於告發更不究實多致擾害自今許人戶越訴官吏并訟者重寘典憲及有阨治停閉苗脉不發之所州縣勒令阨戶虛認歲額提點鑄錢司覈實追正

礮唐於晉州置平陽院以收其利開成三年度支奏罷之乃以礮山歸之州縣五代以來復剏務置官吏宋因之白礮出晉慈坊州無為軍及汾州之靈石縣綠礮出慈隰州及池州之銅陵縣皆設官典領有鑊戶鬻造入官市晉汾慈州礮以一百四十斤為一駄給錢六十隰州礮駄減三十斤給錢八百博賣白礮價晉州每駄二十一貫五百慈州又增一貫五百綠礮汾州每駄二十四貫五百慈州又增五百隰州每駄四貫六百散賣白

磬坊州斤八十錢汾州百九十二錢無為軍六十錢綠
磬斤七十錢建隆中詔商人私販幽州磬官司嚴捕沒
入之繼定私販河東幽州磬一兩以上私鬻鬻磬三斤及
盜官磬至十斤者棄市開寶三年增私販至十斤私鬻
及盜滿五十斤者死餘罪論有差太平興國初以歲鬻
不充迺詔私販化外磬一兩以上及私鬻至十斤並如
律論決再犯者悉配流還復犯者死淳化元年有司言
慈磬滯積小民多於山谷僻奧之地私鬻禹侵利而緣磬

價賤不宜與晉礮均法詔同犯私茶罪賞先是建隆二年命左諫大夫劉熙古詣晉州制置礮許商人輸金銀布帛絲綿茶及緝錢官償以礮凡歲增課八十萬貫太平興國初歲博緝錢金銀計一十二萬餘貫茶計三萬餘貫端拱初銀絹帛二萬餘貫茶計十四萬貫至是言者謂礮直酬以見錢商人以陳茶入博有利豪商無資國用詔今後惟聽金銀見錢入博至道中白礮歲課九十七萬六千斤綠礮四十萬五千餘斤鬻錢一十七萬

餘貫真宗末白礮增二十萬一千餘斤綠礮增二萬三千餘斤鬻錢增六萬九千餘貫天聖以來晉慈二州礮募民鬻之李鬻礮一盆多者千五六百斤少者六七百斤四分輸一入官餘則官市之無為軍亦置務鬻南礮後聽民自鬻官置場售之私售礮禁如私售茶法六年詔弛兩蜀榷礮之禁時河東礮積益多復聽入金帛芻粟芻粟虛估高商人利於入中麟州粟斗實直錢百虛估增至三百六十礮之出官為錢二萬一千五百纔易粟

六石計粟實直錢纔六千而礮一駄已費本錢六十縣官徒有榷礮之名其實無利嘉祐六年罷入芻粟復令入緝錢礮以百四斤為一駄入錢京師榷貨務者為錢十萬七千入錢麟府州者又減三千自是商賈不得專其利矣皇祐中晉慈入礮二百二十七萬三千八百斤以易芻粟之類為緝錢十三萬六千六百無為軍礮售緝錢三萬三千一百治平中晉慈礮損一百九萬六千五百四斤無為軍礮售錢歲有常課發運使領之視皇

祐數無增損熙州礮至是入三十九萬六千斤亦以易
緝錢助河東歲糴熙寧元年命河東轉運司經畫礮鹽
遺利李師中言官積礮三百斤走鹵消耗恐後為棄物
詔令商人入中糧草即以償之三年罷潞州交子務以
妨中納糧草筭請礮鹽故也知慶州王廣淵言河東礮
為利源之最請河東京東河北陝西別立礮法專置提
舉官詔遣光祿丞楊蟠會議以聞蟠言坊州產礮官雖
置場而商多私售請置鑊戶定其數許於陝西北界黃

河東限潼關南及京西均房襄鄧金州光化軍令鎗戶
遞相保察或私賣越界禁如私白礮法仍增官獲私礮
輒以夾雜減斤重之法從之元豐元年定畿內及京東
西五路許賣晉隰礮陝西自潼關以西黃河以南達于
京西均房襄鄧金州則售坊州礮礮之出於西山保霸
州者售於成都梓州路出無為軍者餘路售之私鬻與
越界者如私礮法自熙寧初礮法始變歲課所入元年
為錢三萬六千四百緡有奇併增者五年乃取熙寧六

年中數定以十八萬三千一百緡有奇為新額至元豐
六年課增至三十三萬七千九百緡而無為軍礮歲課
一百五十萬斤用本錢萬八千緡自治平至元豐數無
增損元祐元年戶部言商旅販礮舊聽其便迺者發運
司請用河東例令染肆鋪戶連保豫買頗致抑擾詔如
舊制元符三年崇儀使林像奏禁河北土礮非便若即
河北產礮地置場官買增價出之罷運晉礮則官獲淨
利無運載之勞民資地產省犯法之弊詔下戶部初熙

豐間東南九路官自賣礮發運司總之元祐初通商紹聖復熙豐之制大觀元年定河北河東礮額各二十四萬緡淮南九萬緡罷官賣從商販而河東河北淮南各置提舉官政和初復官鬻罷商販如舊制淮南礮事司罷歸發運司上供礮錢責以三萬三千一百緡為額三年有司奏減河北河東并淮南礮額計十六萬緡四年礮額復循大觀之制五年河北河東緣礮聽客販於東南九路民間見用者依通商地籍之聽買新引帶賣大

率循倣鹽法宣和中舉比較增虧賞罰未幾以擾民罷
建炎三年措置財用黃潛厚奏許商人販淮南礮入東
南諸路聽輸錢行在而持引據赴場支礮紹興十一年
以鑄錢司韓球言撫州青膽礮斤錢一百二十文土礮
斤三十文省鉛山場所產品高於撫青膽礮斤作一百
五十文黃礮斤作八十文二十九年以淮西提舉司言
取紹興二十四年至二十八年所收礮錢一年中數四
萬一千五百八十五緡為定額其他產礮之所若潭州

瀏陽之永興場韶州之岑水場皆置場給引歲有常輸
惟漳州之東去海甚邇大山深阻雖有采礬之利而潮
梅汀贛四州之姦民聚焉其魁傑者號大洞主小洞主
土著與負販者皆盜賊也

香宋之經費茶鹽礬之外惟香之為利博故以官為市
焉建炎四年泉州抽買乳香一十三等八萬六千七百
八十斤有奇詔取赴榷貨務打套給賣陸路以三千斤
水路以一萬斤為一綱紹興元年詔廣南市舶司抽買

到香依行在品答成套召人算請其所售之價每五萬貫易以輕貨輸行在六年知泉州連南夫奏請諸市舶綱首能招誘舶舟抽解物貨累價及五萬貫十萬貫者補官有差大食蕃客囉辛販乳香直三十萬緡綱首蔡景芳招誘舶貨收息錢九十八萬緡各補承信郎閩廣舶務監官抽買乳香每及一百萬兩轉一官又招商入蕃興販舟還在罷任後亦依此推賞然海商入蕃以興販為招誘僥倖者甚衆淳熙二年郴桂寇起以科買乳

香為言詔湖南路見有乳香並輸行在榷貨務免科降十二年分撥榷貨務乳香於諸路給賣每及一萬貫輸送左藏南庫十五年以諸路分賣乳香擾民令止就榷貨務招客筭請紹熙三年以福建舶司乳香虧數詔依前博買開禧三年住博買嘉定十二年臣僚言以金銀博買洩之遠夷為可惜乃命有司止以絹帛錦綺瓷漆之屬博易聽其來之多寡若不至則任之不必以為重也

宋史卷一百八十五

宋史卷一百八十五考證

食貨志下七舊直觔百六十八百以八十五為數後增
為二百百用省數以便出入。臣開鼎按省百不足
百也上八十五是也今云便出入當是足百說見日

知錄


十月諸路官鹽酒直上者升增錢二。

臣開鼎

按下文

陳遘奏江淮等路官監酒直上者升權增錢五則此

鹽字乃監字之譌



宋史卷一百八十五 考證



總校官庶吉士臣張能熙

校對官庶吉士臣嚴福

謄錄監生臣彭希純